



REPUBLIKA E SHQIPËRISË
SHKOLLA E MAGJISTRATURËS
KËSHILLI DREJTUES

Nr. 1527/prot.
6

Tiranë, më 17.12.2025

V E N D I M

Nr. 38, datë 17.12.2025

**PËR
DISA SHTESA DHE NDRYSHIME NË RREGULLOREN E BRENDSHME TË
SHKOLLËS SË MAGJISTRATURËS**

Në mbështetje të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, të ligjit nr. 115/2016, “Për organet e qeverisjes së sistemit të drejtësisë”, Këshilli Drejtues i Shkollës së Magjistraturës, i mbledhur më datë 17.12.2025.

V E N D O S I:

I. Të bëhen këto shtesa e ndryshime në Rregulloren e Brendshme të Shkollës së Magjistraturës, të miratuar me vendimin nr.1, datë 31.1.2017, i ndryshuar:

1. Në nenin 23 “Mënyra e vlerësimit për provimin e pranimin për kandidatët për magjistratë, për këshilltarë, ndihmës ligjorë dhe avokatë shteti”, pika 2, ndryshon si vijon:

“Teza e fazës së parë do të përbëhet: “Rubrika 1: E drejta kushtetuese dhe të drejtat e njeriut (15 pikë); Rubrika 2: E drejta administrative (15 pikë); Rubrika 3: E drejta civile (10 pikë); Rubrika 4: Procedura civile (10 pikë); Rubrika 5: E drejta familjare (5 pikë); Rubrika 6: E drejta e punës (5 pikë); Rubrika 7: E drejta penale (10 pikë); Rubrika 8: Procedura penale: (10 pikë); Rubrika 9: E drejta e BE-së dhe e drejta ndërkombëtare publike (10 pikë); Rubrika 10: Etika (10 pikë).”

2. Aneksi 2 “Procedura e organizimit të provimit për seleksionimin e kandidatëve për në Shkollën e Magjistraturës”, Rregulli III, Aplikimi, ndryshon si vijon:

“Provimi do të zhvillohet në të njëjtën sallë dhe do të vlerësohet elektronikisht po aty, në prani të pjesëmarrësve.

Përzgjedhja e tezës së testimit, nga fondi i gjithë pyetjeve të përgatitura, do të bëhet nga vetë kandidatët para fillimit të testimit seleksionues dhe do të fotokopjohet në prani të tyre.

Fondi i pyetjeve do të përgatitet nga Shkolla e Magjistraturës me ndihmën e Institucioneve Ndërkombëtare dhe do të përbëhet të paktën nga 2000 pyetje në total për të gjitha fushat e testimit.

Teza do të jetë e njëjtë për të gjithë pjesëmarrësit.

Teza e provimit vlerësohet maksimalisht me 100 pyetje/100 pikë.

Teza do të jetë e strukturuar në 10 rubrika.

Teza e fazës së parë do të përbëhet nga:

Rubrika 1: E drejta kushtetuese dhe të drejtat e njeriut (15 pikë); Rubrika 2: E drejta administrative (15 pikë); Rubrika 3: E drejta civile (10 pikë); Rubrika 4: Procedura civile (10 pikë); Rubrika 5: E drejta familjare (5 pikë); Rubrika 6: E drejta e punës (5 pikë); Rubrika 7: E drejta penale (10 pikë); Rubrika 8: Procedura penale: (10 pikë); Rubrika 9: E drejta e BE-së dhe e drejta ndërkombëtare publike (10 pikë); Rubrika 10: Etika (10 pikë).”

3. Aneksi 7/3 “Marrëveshja e regjistrimit për kandidatët për avokatë shteti”, shtohet sipas dokumentit bashkëngjitur, pjesë e pandarë e këtij vendimi.

II. Ky vendim hyn në fuqi menjëherë.

Aneks 7/3 Marrëveshja e regjistrimit për kandidatët për avokatë shteti

MARRËVESHJA E REGJISTRIMIT PËR KANDIDATËT PËR AVOKAT SHTETI

Sot, më datë _____, në qytetin e Tiranës, në Shkollën e Magjistraturës të Republikës së Shqipërisë, bazuar në ligjin nr. 115/2016, "Për organet e qeverisjes së sistemit të drejtësisë", ligjin nr. 10018, datë 13.11.2008, "Për Avokaturën e Shtetit", si dhe në Rregulloren e Brendshme të kësaj Shkolle, lidhet kjo aktmarrëveshje me palë:

Kandidati për avokat shteti, z./znj. _____, i biri/e bija i/e _____, lindur më _____, në _____ dhe banues në _____, Rr. _____, Pall. _____, Ap. _____.

Dhe

Shkolla e Magjistraturës e Republikës së Shqipërisë, që ndodhet në Tiranë, me adresën: Rruga "Ana Komnena", godina "Poli i Drejtësisë", përfaqësuar nga Drejtori i Shkollës.

Neni 1

Objekti i kësaj marrëveshjeje është përcaktimi i të drejtave dhe detyrimeve midis palëve në përputhje dhe zbatim të ligjit nr. 115/2016, "Për organet e qeverisjes së sistemit të drejtësisë", ligjit nr. 10018, datë 13.11.2008, "Për Avokaturën e Shtetit", Rregullores së Brendshme të Shkollës së Magjistraturës, miratuar me vendimin nr. 1, datë 31.1.2017 (i ndryshuar).

Neni 2

Me nënshkrimin e kësaj marrëveshjeje, kandidati për avokat shteti konsiderohet i regjistruar në Shkollën e Magjistraturës. Kjo marrëveshje ka fuqi të plotë për palët deri në përfundim të Programit të Formimit Fillestar.

Neni 3

Të drejtat e kandidatit për avokat shteti:

- a) Kandidati për avokat shteti, i cili pranohet të ndjekë Programin e Formimit Fillestar në Shkollën e Magjistraturës përfiton bursë shkollimi sipas pikës 6 të nenit 27 të ligjit nr. 10018, datë 13.11.2008, "Për Avokaturën e Shtetit";
- b) Kandidati për avokat shteti ka të drejtën të trajnohet sipas një procesi të rregullt mësimor, sipas një programi dhe plani mësimor të përcaktuar në fillim të vitit shkollor dhe që mund të pasurohet me cikle të posaçme leksionesh në fusha të së drejtës, etikës, sociologjisë dhe psikologjisë juridike.

- c) Kandidati për avokat shteti ka të drejtë të ketë akses të plotë në procesin mësimor dhe krijimin e lehtësive të nevojshme për kualifikimin kompleks individual të tyre, duke vënë në dispozicion bibliotekën, sallën e gjyqeve imituese, platformën “SMVSHM”, dhe pajisje teknike për stimulimin e shkathtësive për veprimtari të pavarur të tyre;
- d) Kandidati për avokat shteti merr pjesë në veprimtarinë drejtuese të Shkollës, nëpërmjet angazhimit të tij të drejtpërdrejtë në mbledhjet e Asamblesë së kandidatëve.

Neni 4

Detyrimet e kandidatit për avokat shteti:

- a) Kandidati është i detyruar të frekuentojë rregullisht programin dhe të respektojë Rregulloren e Shkollës. Mungesa e pajustificuar në më shumë se 10 për qind të programit të një lënde, sjell përgjegjësi disiplinore sipas kësaj Rregulloreje;
- b) Kandidati është i detyruar të marrë pjesë rregullisht në të gjitha proceset e vlerësimit të lëndëve dhe aktiviteteve të tjera mësimore, sipas planit mësimor dhe programeve mësimore, në datën e caktuar nga Shkolla e Magjistraturës, përveçse në rastet kur paraqiten arsye të përligjura dhe objektive. Vlerësimi në këto raste, për efekt të ruajtjes së sekretimit, kryhet me kandidatët e vitit pasardhës, sipas parashikimeve të detajuara në Rregulloren e Brendshme të Shkollës;
- c) Kandidati për avokat shteti duhet të plotësojë të gjitha detyrimet që lindin nga zbatimi i programit dhe planit mësimor, si në procesin e përbashkët, ashtu dhe në atë individual të kualifikimit, përfshirë pjesëmarrjen në çdo aktivitet të udhëzuar nga ana e Shkollës, si Konferenca, aktivitete tematike, vizita studimore, konkurse etj.;
- d) Vlerësimi “pamjaftueshëm” i marrë dy herë radhazi, të paktën në dy lëndë ose në provimin përfundimtar, passjell, sipas rastit, humbjen e së drejtës për vijimin e studimeve në Shkollën e Magjistraturës;
- e) Kandidati për avokat shteti nuk kanë të drejtë të rivlerësohen për lëndën, me qëllim përmirësimin e rezultateve. Vetëm në raste tepër të veçanta, që diktohen nga rrethanat dhe për arsye objektive të përligjura, kandidati mund të vlerësohet në vitin pasardhës, pasi të ketë marrë më parë miratimin e Këshillit Pedagogjik të Shkollës;
- f) Kandidati për avokat shteti, gjatë të dy viteve të Programit të Formimit Fillestar, nuk mund të angazhohet në aktivitete të tjera profesionale, qoftë edhe në veprimtari mësimdhënëse;
- g) Kandidati për avokat shteti detyrohet të respektojë rregullat për etikën, të sillet me integritet, të kujdeset për të ruajtur rregullin dhe qetësinë në mjediset e brendshme të Shkollës, të mirëmbajë dhe miradministrojë materialet dhe pajisjet që i vihen në dispozicion gjatë kohës së frekuentimit të Shkollës, në përmbushje të të gjitha detyrimeve që burojnë nga Rregullorja e Shkollës;

- h) Kandidati për avokat shteti është i detyruar të kthejë shumën e përfituar të bursës së shkollimit, brenda një viti, në rastet kur:

I) kandidati është përjashtuar ose ka lënë Shkollën;

- i) Këshilli Drejtues i Shkollës së Magjistraturës, për shkaqe shëndetësore ose për shkaqe të tjera të justifikuara, miraton me vendim përjashtimin e kandidatit për avokat shteti nga detyrimi për kthimin e shumës së përfituar të bursës së shkollimit. Vendimi i Këshillit Drejtues lidhur me pagimin ose jo të detyrimeve financiare përbën titullin ekzekutiv.

Neni 5

Detyrimet e Shkollës së Magjistraturës:

- a) Të garantojë një proces të rregullt mësimor, sipas një programi dhe plani mësimor të përcaktuar në fillim të vitit shkollor dhe që është i përshtatur edhe për nevojat për trajnim për këtë kategori;
- b) Të sigurojë akses të plotë të kandidatëve në procesin mësimor dhe krijimin e lehtësive të nevojshme për kualifikimin kompleks individual të tyre, duke vënë në dispozicion bibliotekën, sallën e gjyqeve imituese dhe pajisjet teknike të nevojshme për procesin mësimor dhe për veprimtari të pavarur të tyre në përmbushje të detyrave të dhëna nga Shkolla;
- c) Të japë bursë në përputhje me dispozitat e ligjit nr. 10018, datë 13.11.2008, "Për Avokaturën e Shtetit";
- d) Të ndjekë procedura të rregullta që sigurojnë mbrojtjen e kandidatëve ndaj masave të padrejta disiplinore, si dhe të japë informacion të plotë për vlerësimet që marrin për përmbushjen e detyrimeve në procesin mësimor.

Neni 6

Kjo kontratë hartohet në tri kopje. Një kopje i jepet secilës palë dhe kopja e tretë depozitohet pranë Avokaturës së Shtetit.

D R E J T O R

KANDIDATI
PËR AVOKAT SHTETI
